

TSHWAETSO

Ke leboha, haholo-holo. Ha re tswe re sa eme motsotso
feelaa jwale re sa inamisa dihlooho tsa rona thapelong.
Mme e re re sa inamisitse dihlooho tsa rona, le dipelo tsa rona,
ke ipotsa bongata bo nang le kopo ka mona, bo ka e tsebisang
Modimo le sa phahamisa matsoho a lona? Mme jwale aka
hopole kopo ya hao re sa rapela.

2 Ntate ya Mahodimong, re thabetse sena haholo bosius
bona, nako e nngwe eo re ka tleng ho Wena ka yona, le ka
kgodiso ena hore seo re se kopang re a se fumana, ha re dumela
seo re se kopang. Mme jwale, Morena, thusa ho se dumele ha
rona, re tle re amohele tseña tseo re di kopang bosius bona.
Matsoho a ka, le matsoho a bona, a phahame. Mme re a rapela,
Ntate, ho Wena Ya utlwisang tseo re di hlokang. E abele,
bona, rona, Morena, bosius bona. Re rapella kgothatso, re sa
le horeng e kgolo ena ya tsieleho, yona... le maemo ao lefatshe
le leng ho wona, re hlile re hloka thuso ya Hao e halalelang,
Morena. Mme re O kopa ho re kgothatsa ka Lentswe la Hao,
re tle tle re tsebe ho itshwara, pejana ho ho Kgutla ha Morena
Jesu. Fana ka sena, Ntate. Re kopa ka Lebitso la Jesu. Amen.

Le ka dula fatshe.

3 Ke thabo ho kgutla hape bosius bona, le ho bua hape ka
Morena wa rona ya lereko. Ho hotle ho kgutlela Lane Tech. Eka
ho kgutlela lapeng; ke tlile kwano hangata. Mme jwale ke ba
bona ba behile diduku tse ngata mona ho rapellwa. Mme jwale,
maobane bosiu, re ne re loketse jwalo, re kwetse ditshebeletso
tsa rona tsa tlwaelo tsa phodiso, ra phutha ditlankana tsa rona
le dintho, ka baka la ho tshwarana le ditshebeletso tse pedi. Le a
bona, e batla e le kgatello, ho tshwarana le e-e ditshebeletso
tse pedi. Mme jwale ehlile re tla rapella diduku tseña bosius
le ho tshepa hobane Morena o tla baballa e mong le e mong wa
lona, ka tumelo e tla amohela se a se kopileng diqelong tsena.

4 Ruri re tilo hlolohelwa Moena Mel Johnson hosane, le
mmino o monate oo. Ke hlile ke ananela lentswe le monate le
Morena a mo fileng lona.

5 Mme jwale, hosane, haeba le etetse kwano, ke bua
le batho ba tabernakele, ho na le... ke na le metswallie
e mmalwa e tswang tlase Jeffersonville. Ke kgolwa e le
kerekeng ya Filadelfia mono, Moena Mead, moena rona, ke a
kgolwa ba tshwere tshebeletso mono. Mme ha ke tsebe haeba
lona, le na le tshebeletso? Tshebeletso e teng. Lona, ka nako
mang? [Motho o re, "Leshome le motso."—Mong.] Hora ya
leshome le motso, tshebeletso e tla tshwarwa mono. Mme ke
tshepa ke tla kgutla ka bo mashome a mararo ka morao ho

nngwe, kapa ya bobedi, ntho e nngwe... Ya boraro, ke—ke loketse ho fihla mono ka ya boraro, hora ya boraro, mme—mme hosane mantsiboya ka hora ya bosupa. Ka hona ruri re batla ho le memela bohole ho tla ditshebeletsong, ha le se na ditshebeletso kerekeng tsa lona.

⁶ Ehlide ha re batle ho le tlosa mosebetsing wa lona, hoba hase morero wa rona oo. Ke ho leka ho tshwassa, boholo, ba sa bolokehang. Ba se nang Moya o Halalelang, mme le—le hlile le a dumela hore le a O hloka, mme re mona ho le thusa ke hona. E ntano ba bakudi le ba mahlomoleng, kgele, re mona ho ba rapella, ho tswa dikerekeng tsohle. Mme lona le kgutlele kerekeng tsa lona, moo le tswang teng. Haeba o amohetse Moya o Halalelang, kapa o fodile, kgutla ka bopaki, bolella ba bang. Leha kwana kereke ya hao e sa e dumele, le hona. Le a bona? Teng, ho bonolo ho kgantsha Lesedi la hao moo e—e Lesedi le leng le ngata, empa re batla Lesedi moo Lesedi le leng siyo. Ke hona moo le nang le kgahlamelo e kgabane teng.

⁷ Mme ke a o leboha, Moena Vayle. [Moena Vayle o sa tswa lokisa maekrofounu, mme jwale o re, “Ema tjena, re tlamehile ho sheba seo.”—Mong.] Moena Vayle o hopotse hore ha ba utlwe. Na hoo ho ntlafetse? Be, ke bottle, ke hantle.

⁸ Jwale, bosius bona, kaha tshebeletso ya phodiso e le siyo, ke kgolwa, ke tlamehile ho tswa pejana bosius bona. Esale ke—ke re, bosiu ka bong, “Ke tla leka ho le ntsha ka bomashome a mararo ka mora robong.” Mme nako eo e batla e fihlile, mme ka hona, hora ya borobong, metsotso e ka bang mehlano ya yona. Mme etlare ha ke qeta, mme ke se ke le tshwareletse dihora tse ka bang pedi hoseng hona, ke tla le bolella, le tla be le kgathetse mme le tla thabela ho tsamaya ha ka motseng hosane mantsiboya. Empa eka nka theohela ditherong tseo tsa metsotso e mashome a mabedi. Empa ke tlamehile ho nna ke bua hofihlela ke kgathala, mme ke a tseba hore ka nako eo le se le kgathetse. Ka hona ha nke ke qeta le ka mohla; ke mpa ke kgaola feela mme ke kene, ho phomola nakwana.

⁹ Jwale, bosius bona, ke batla le phetle Bibeleng tsa lona, ho Esaia, Buka ya Esaia, e—e kgaolo ya bo 6 ya Esaia. Mme jwale pele re bala, re tla kopa Modimo ho hlohonolofatsa Lentswe la Hae le ho—ho re netefaletsa Lona, re sa inamisa dihlooho tsa rona nakwana feela. Be, re tla bala Lentswe pele, mme le mamele ka hloko jwale re sa bala.

*Ka selemo sa ho shwa ha morena Osiase ke ne
ke...ka bona JEHOVA a dutse teroneng e kgolo, e
phahameng, mophetho wa seaparo sa hae wa tlala
tempole.*

Mme serafime di ne di eme hodimo ho yena: se seng le se seng se ne se ena le mapheyo a tshaletseng; ka a mabedi din e di itshireletsa difahleho, ka a mabedi din e di ikwahela maoto, ka a mabedi din e di rura.

Tsa howeletsana, tsa re, O a halalela, o a halalela, o a halalela, JEHOVA MODIMO wa makgotla: lefatshe lohle le tletse kganya ya hae.

Yaba metheo ya menyako ya tempele e sisinyeha ke lenswe la mohoo oo, mme tempele ya tlala mosi.

Yaba ke re, Ho madimabe nna! Ke timetse; hobane nna ke motho ya melomo e ditshila, ke ahile hara setjhaba se melomo e ditshila: mme ke bone Morena, JEHOVA wa makgotla ka mahlo a ka.

Empa serafime se seng sa rurela ho nna, se tshwere leshala le hlenneng letsohong la sona, leo se le okgileng aletareng ka letlao:

Sa ama molomo wa ka ka lona, sa re, Leshala lena le se le amile melomo ya hao: jwale bokgopo ba hao bo tlositswe, sebe sa hao se phekotswe.

Ka ntoo utlwa lenswe la Morena, le re, Ke tla roma ofe, ho tlo ya mang bakeng sa rona? Mme ka re, Ke nna enwa; roma nna.

¹⁰ Ha re rape leng. Morena Jesu, re haellwa ho ngwatha theron e kgethe hileng ena, bosius bona, empa jwale re kopa thuso ya Hao, Morena, ka morero o le mong feela hore—hore Evangeli e tle e boole e bolelwe motseng wa Chicago. Aba sena, Morena. Mme a—a tshwaetso e be tshwaetso yakamehla. Aba sena. Re e kopa Lebitsong la Jesu. Amen.

¹¹ Jwale ke batla ho ntsha theron mona, ya: *Tshwaetso*. Le a tseba, ntho e nngwe e teng, ka rona, seo re se etsang, re tshwaetsa motho e mong ka seo re se etsang, kamoo re itshwarang kateng, kamoo re buang kateng, kamoo re phelang kateng. Mme sohle seo re se etsang, re tshwaetsa motho e mong.

¹² Mme jwale, le a tseba, boholo ba batho ha bo tsamaye kereke. Ba re... Be, ba na le mohopolo o phoso ka kereke. Ba nahana hore e—e basadi ba teng ke—ke baloi, mme e—e monna ke—ke matemona a apereng botsho, mme ba na le mohopolo o phoso ka yona. Empa ke tla le bolella seo ba hlileng ba se etsang, ba beha bophelo ba hao leihlo ho sheba seo o se etsang. Ke kgolwa e le Pauluse ya itseng, “Re mangolo a ngotsweng a Modimo, a balwang ke batho bohole.” Ha o kena seterateng, leha o le mosebetsing wa hao, le hohle moo o leng teng, motho o ntse a o behile leihlo.

¹³ Mme haholo-holo ka mora ho bua le ho ipolela o le Mokreste, ba hlile ba o beha leihlo, mme hoo ho tshwaetsa

e—e ba o teetseng hare. Mme re tlameha ho hlokomela se re se etsang. Hobane, haeba re hlahisa tshwaetso e phoso, ke moo re tlisang sekgobo, e seng hakalo ho rona, empa e le hodima seo re itlalehang sona: Bakreste. Re se dihela hodima Kreste. Mme ha ho motho, hola re ka nahana, ha o rate ho dihela sekgobo hodima Kreste le ka mohla. Empa boitshwaro bo phoso, ka nako e phoso, bo ye bo hlahise kgadimo e phoso mothong ya o shebileng. Mme motho e mong le e mong o behilwe leihlo, ha o itlaleha o le Mokreste.

¹⁴ Jwale theroy a tshwaetso eo re buang ka yona, bosius bona, e kgutlela morao, thuto ya yona ya nneta, ha le batla ho—ho e bala, le tla e fumana ho Dikronike tsa Bobedi, kgaolo ya 26. E ne e le bophelo ba morena enwa, Osiase.

¹⁵ Jwale, morena Osiase e ne e le moshanyana wa modisana. E le mothaka e motjha, eo, mora morena, mme a rata nahathote. A—a rata e—e meru mme e le monnana wa modisana. A bile a rata masimo a merara, a rata ho bona dintho ha di mela. Mme thaka lena la na la hodisetswa tshwaetsong e ntle. Amatsia, ntatae, ebile monna e moholo tshiung tsa hae, mme o kile a kgoptjwa nakwana, mme a inkela medingwana naheng e sele, mme yaba Morena o mo tlosa lefatsheng. Empa thaka lena o ne a tshwaeditswe hantle, hoba mmae e be e le moradi wa Jerusalema, ntatae e le modumedi, mme ka hona e—e moshanyana a hodisitswe ka tshwaetso e ntle.

¹⁶ Mme ke tsela e ntle ya ho hodisa ngwana eo, kamoo a lokelang ho tsamaya. Mme le a tseba keng? Mahlo a matonana a o shebileng ke bana ba hao. Ba sheba seo o se etsang. Mme sohle se o se etsang, ba o futsa, hoba o ntse o ba beela mohlala, ka seo o se etsang.

¹⁷ Ke sa hopotse. Ha se kgale haholo mona, kopanong le Borakgwebo ba Bakreste ba Evangedi e Tletseng, koo Los Angeles. Mme Moena Oral Roberts a buile puo ya mokgalo wona, mme ba nkopa ho ema le ho tshwaela ka yona, malebana le tshwaetso. Ka na ka re:

¹⁸ Hoo ho nkgopotsa pale e ke e badileng, moo e—e monna ya kileng a tswa, pejana ho Keresemose, a ntse a aba dimpho tikolohong ya habo, metswalleng ya hae, le baahisaneng. Mme nako le nako, eneraha a kena tulong, a—a ngapetse mnonyana. A kene lapeng le latelang, mme a ngapetse nnonyana. Mme hoba a qete ho aba dimpho tsa hae—tsa hae tsohle, le tseo a di bokeletseng; eitseha a kgutla, a hopola ho kgaoletsa hara paka. Mme ho ne ho kgethehile lehlwa la maoto a ka bang mane kapa a tsheletseng. Mme a iphumana, a sa kgone ho tsamaya a tsepame, a tswedipana kaha a ne a susumetswa ke dino tsena.

¹⁹ A lemotha hobane, o setswe morao ke motho, a sa kgone ho mo tshwara, e ne e le moshanyana wa hae, ntjhanyana wa dilemo tse supileng; mme o ne a hlile a takalatsa, mme a bile a

hlanama, mme a tswedikana. A emela thakanyana leo ho fihla ho yena ke hona, mme a re, "Mora, hobaneng o tsamaya ka mokgwa oo?"

A re, "Ntate, ke ntse ke leka ho hata mehlaleng ya hao."

²⁰ Jwale taba eo hase e—e mohlala feela, hobane ke nnete, ke ho re, bana ba hao, ke wena ya ba betlelang moralo.

²¹ Mme haeba batho ba heso ba Amerika ba betla moralo kajeno, ka pela bana ba rona, wa ho tsuba disakrete, basadi le monna, ho nwa, le dikarete ka tlung, le—le mataese, re tla fumana batho ba mofuta ofe—ofe morabeng o tla latela, kapa molokong o tla latela, ke rialo, o tla latela? E tla be e le boiyane ba mahlanya. Etswe ke nahana lefatshe le le maemong ao. Haeba morabe ona, kapa moloko ona, ke rialo, o le tjena, o latelang o tla hlasisang? Ka hona haeba o mong o ka hlahla, kgele, morabe wohle wa batho, ha o tswelapele tjena, o tla fela, ka hohle-hohle, hobane re a ipolaya mme re beela ba bang mohlala.

²² Mme esita le Bakreste kajeno, ba ipolelang Bakreste, mme ba tsuba mme ba nwa, mme—mme ba qhekanyetsa, mme ba reka ka qhekanyetso. Athe rona...Kgele, ha se mohlolo ha Bokreste bo le dinotong tsa bona tse tlase-tlase nakong ena. Ke tshwaetso eo batho ba kereke ba—ba e beileng hodima motho ya eso amohele Kreste. Motho o batla ho boloka bopaki ba hae mme a ntso phela kamoo a batlang.

²³ Empa ke ka baka leo Moya o Halalelang e leng e—e e tlameho e tiileng hakana letsatsing lena, hoba ke Wona O phelang bophelo ba hao. Ha o iphelele bona ka bowena. Ke Kreste ka ho wena, ka hona, hoba o amohele Moya o Halalelang. Mme, haeba A sa nka maemo a pele bophelong ba hao, o mpe o hopole feela, ha o eso amohele Moya o Halalelang. Hoba, haeba A le ka ho wena, O tla phela Bophelo ba Hae ka Sebele. Ha e sa hhole e le wena. "O shwele, mme bophelo ba hao bo patilwe ka ho Modimo, ka Kreste, mme bo tiisitswe ka Moya o Halalelang." Mokgwa wa hore ebe wena ha o sa le yo, seo o neng o le sona.

²⁴ Jwale, moshanyana enwa, re fumana hore, yena, ka ho ba le motswadi ya lokileng enwa, ya molemo le kwetliso, ya...Mohla ntatae a ne a eshwa, kgele, keha a le leshome le metso e tsheletseng la dilemo, mme batho ba mo nka ba mmeha morena. Mme a hlwella boholong ba terone a le dilemo tse leshome le metso e tsheletseng feela. Mme ha o ka bala bophelo ba hae, ha a ka a tshwaetswa ke dipolotiki tsa naha ya habo. Ha a—a ka a nka mohopolo o tumileng. "A mpa a ipatlela Modimo," Bibele e boletse.

²⁵ Jwale, hoo, ke sona se mo entseng mohlala o moholo hakana ho moporofeta e motjha enwa, mehleng yona eo, Esaia. Esaia moporofeta o phetse mehleng ya morena Osiase. Mme

bobedi ba le batjha, moporofeta le morena, setswalle sa bona se ne se tlotswe mafura. Mme Esaia a dula tlung ya borena, mme a itshetleha ka letsoho la—la morena. Mme re fumana tshwaetso ya mohlankana enwa e tshwaetsa Esaia. Ya eba mohale ho—ho Esaia, hoba (yena a) a se ke a tsotella batho, a sa dumelle letho ho mo tsokoletska kwana le kwana, mme a ikanela ho sebeletsa Modimo, le ho sebeletsa Modimo a nnotshi. Mme mohlala wa motho ya lokileng jwalo o tshwanetse ho salwa morao. Yona...

²⁶ Mme re mo fumana a sa ka a qeka lefatshe la bohetene, lefatshe la bohetene; hoba ba mmone a haha mmuso wa hae wa hola, mme Modimo wa ba le yena mme wa mo hlohonolofatsa.

²⁷ Mme Modimo o tla hlohonolofatsa mang le mang ya emang le Lentswe la Hae. Jwale, hoo, Modimo o tlamehile ho etsa hoo, ho hlohonolofatsa mang le mang ya emang le Lentswe la Modimo.

Jwale re bona Esaia a hlile a rata morena enwa.

²⁸ Mme yaba mmuso wa morena o a nama. Ke a kgolwa o ne a latela Salomone, mmusong wa hae, hoba tshwaetso ya hae e bile ya kekella tlase kwana Egepeta.

²⁹ Ebile thuso e kgolo ho Esaia, moporofeta e motjha, ho bona hobane motho mang le mang ya emelang Modimo, mme ho sa tsotellwe dipolotiki kapa letho le sele, a ka ema le Lentswe hantle. Ya hla ya eba tshwaetso ho moporofeta, Esaia. Mohlankana enwa, kamoo Modimo a ileng a mo hlohonolofatsa, kaha a ne a tshepahetse Lentsweng.

³⁰ Jwale re fumana morena enwa, oh, a etsisitse Bakreste ba bangata ba kajeno. Ha feels a ikokobeditse, ke moo Modimo a mo hlohonolofatsang. Empa mona Bibele e a bolela, ho re, “Eitse hobane a ikgohomose.” Hoba a thee ntho tsohle ka botsitso, a ikgohomosa, mme yaba o kene tseleng ya hae e fapohang.

³¹ Jwale, ho jwalo, kajeno ho a tshwana, ka—ka dikereke. Esale ho ituletse jwalo, motho ha a iphihlela a ikgona, ha ba sa hloka ho rapela, ha ba sa tlameha ho emela Modimo tshebetsonya ya bodisa ba bona.

³² Ha le ka tshwarela hlahiso ena, ke dumelana le mongodi e mong, ke sona sesosa sa banna ba bangata bana ba hlahileng ditsoseletsong tseña tsa letsatsi-la-morao, kapa tsoselletsong ena ya letsatsi-la-morao, ho—ho fofa ba phatloha. Bang ba bona ba tlalehilwe ba tahilwe difaleng tsa bona, mme—mme bang ba bona ba sitilwe. Ke kahobane ba—ba ena le tshusumetso e kgolo bathong mme ba iphumana ba ikgona, oo ke mmusonyana wa bona, mme ba ka kgona, ba fupere batho hoo ba ka etsang seo ba se batlang, mme batho ha ba e ellwe. Empa Modimo o a e ellwa, le a bona, ke Yena eo. Nka bolela

hore...Jwaleka Nebukadnesare, tsatsi le leng, ha a kile a tswa mme a re, "Bonang ke theile mmuso o mokakang," mme yaba Lengeloi la Morena le a mo otla.

³³ Mme ha monna kapa mosadi, ho sa tsotelehe ke mobishopo kapa khadinale, kapa se a leng sona, ha o qala o ikutlw a o ikgona, o mpe o qale ho ela hloko mme o nke temoso. Hobane, Modimo a ke ke a o lesa ho tsamaya jwalo, hoba A ke ke a arolelana kganya ya Hae le mang-mang. Tjhe, monghadi. Kganya ke ya Modimo, a nnotshi.

³⁴ Modimo a ka sitsa monna a mo abela tshebetsonyana ya lentswe e batlang e phahametse ya banababo, kapa e sa phahamang, empa e batlang e fapane le ya banababo. Mme ntho ya pele le a tseba, monna o a ikakasa, peta e a tomoloha, mme, oh, kgidi, a ka hla, o tla o thesela seterateng. Mme, hoo, ke mohla ke nahantan hore monna o habile ho tswa monyako, hoba Modimo a ke ke a sebedisa motho ya jwalo.

³⁵ Morena enwa, leha kwana e le monna wa morapedi, a ikutlw a ikgona. A utlw a hore a ka inyolla ka boikgantsho, hore a ka laola tsohle mme a etsa kamoo a ratang, motho ha a lokela ho botsa.

Empa, hopolang, re tlasa Modimo ka dinako tsohle. Modimo ke Modimo wa rona.

³⁶ Mme re a fumana, hore o ile a iphamisa, mme a—a iphamisa hofihlela a nahannne ho re, erekaha 'Modimo a mo hlomphile,' a ka 'ikgapela setulo sa bosebeletsi,' ka hona a tshwara dibano mme a kena ho ikgapela setulo sa bosebeletsi. A fapoha tulo tsa mosebetsi wa hae.

³⁷ Esale ke borella Borakgwebo ba Evangedi e Tletseng bana, "Le se leke ho ipeha bareri le ka mohla." Bareri ba hula ka falese e lekaneng ho leka ho e tsepamisa. Mme rona ka ho kgetha rakgwebo ya sa biletswang le mosebetsi oo ho hang re kgatha tema e bohlaswa. Le a bona, ha o etsa jwalo, o tlola meedi ya hao.

³⁸ Mme mona le ka ithuta thuto. Batho ba bangata ka ntle, esita le sefaleng sena bosius bona, ba rerang, ha ba lokela le ho ba moo, hoba haholo ke tekete ya dijo, kapa ho tuma hara batho, kapa—kapa ho—ho—ho iphumanela ho fetang sa motho e mong, kapa ke ho phathatswa mokokotlong ka dithoriso tse mmalwa, kapa ho hong. Le a bona, ka nako tse ding ba behwa baprista.

³⁹ Jesu o itse, "Le metsa matlu a bahlolohadi, le bile le rata ditulo tse kapele, mme, teng e le ho ipontsha, le etsa merapelo e melelele." O itse, "Le tla fuwa tsuo e lekanang ketso tsa lona." Le a bona?

⁴⁰ Rona—rona ha re a tshwanela, le ka mohla, ho fihla maemong ao. Kamehla re tshwanetse ho hopola hore Modimo

o re batla re ithobile. Mokgwa wa ho nyoloha ke ho kokobela. Ikokobetse, mme o tla phahamiswa. Mme ha o iphahamisa, o tla kgethulwa o kokobetswe.

⁴¹ Jwale re fihlela mohlankana enwa a leka ho ikgapela setulo sa bosebeletsi, athe o ne a se na ditshwanelo tseo.

⁴² Leha kwana, Modimo a mo hlohonolofaditse, e ne e le monna e moholo. A ile a tiisa mmuso wa hae kgahlano le ditjhaba tsa lefatshe. Di ne di isa tlota mme di e lebisa ho yena, homme ka manku le ka makgomo. Mme a bile a ruile badisa, le merara—balemi ba merara le, oh, ntho tsohle. A phela boiketlong, yaba o qala a ikakasa.

⁴³ Re fumana esita le kereke, kereke ya lehae e ka ikokobetsa mme ya fumana e—e setshana e sebeletse Morena ka pelo e tshepehang; mme ere ba atlehe nakwana, motho a ba thuse mme ba fumane e—e kereke e ntlenyana, kapa batla leka ho e ntlatfatsa ho feta e tlase koung, mme ebe phutheho e tsamaya e pepesitse peta. Hoo, le a bona, re—re tshwanela ho hopola, hore hoo ho phoso.

⁴⁴ Modimo o na boelle Israele, “Mohlang oo wena, Ke o thotse nahathote, o le madi,” le maemo a yona mohlang oo, “mme eitse ha o kgora, mme—mme o ba motle, yaba e . . .” ya furalla Modimo, mme be—. . . ya inkela dimelo tsa—tsa seotswa, mme ya mema bohole ho tla e boha. Mme re bona Modimo a sa kgahliswe ke hoo ho hang.

⁴⁵ Mme esita le morena e moholo enwa, wa Israele mona, hoba a leke ho ikgapela madulo a sa . . . a sa a tlotssetswang. Mme re fihlela e—e baprista mona, ba titimela ka hare mme ba mmolella, “Ha se madulo a hao ao. Ha o a tshwanela ho etsa jwalo, hoba Modimo o na le monna a mo kgethetseg hona.”

⁴⁶ Oh, hola tshebetso ya bodisa e ka fihla maemong ao, ba kgethetweng mosebetsi! Hola motho a ka elellwa theroyya Evangedi e se ho hoholela maloko ka hara kereke, empa e le ho kgethelwa e—morero le sepheo, hore re tshwanela ho fumana masea a matjha a tswallwang Mmusong wa Modimo. Ho sa tsotellwe phutheho ya kereke e ba e tsamayang, kapa se amanang le yona, ke ho fumana masea a matjha ao feela.

⁴⁷ Ebe moo kajeno re imelwang ha re bona moruti a hlaha ka nthwana, semaka sa mofuta seo Modimo a se loheletseng tshebetsong ya hae. Re fumana boipeho ba yona ka nama, bongata bo a kena mme bo leka ho—ho re ke sena, ba na le sena, kapa ba futswele nthwana e fapaneng.

⁴⁸ Kajeno ke tseba monna lefatsheng, monna ya kgabane, le hona, monna ya lokileng, mmoledi wa sebele wa Lentswe, mme nka—nka re ke e—e moena wa makgonthe, mme hase kgale ha ke qoqa le yena. Mme o ile a dula a kenwa ke maikutlo, mme theroyya hae o e tshetlehile hodima maikutlo ka ho shwelella,

jwale ba kolobeletsa Bophelong Bosafeleng, “hobane batho ba ke ke ba shwa.” Ke tshohile hobane ba tsamaya hole kwana hodima lekala leo ba sa tlo kgona ho le theoha le ka mohla, le a bona, empa ke kahobane e fosahetse.

⁴⁹ “Motho ya tswetsweng ke mosadi matsatsi a hae a mmalwa, mme a tletse ditsietsi, le mahlomola.” Mme haele ba phelang jwale ba tseba ba tla shwa. Mme re a tseba, “Motho o beetswe ho shwa hang, mme ka morao e ntoo ba kahlolo.” Ka baka leo, re a tseba re tshwanetse jwalo.

⁵⁰ Ha ke batle ho phela motlotlwaneng wona wa kgale wa malwetse esale ke phela ho wona. O tshwara mafu wohle a qhomakang hohle. Ke batla o sa etswang ka matsoho, o bopilweng se-Modimo, oo—oo e seng semela se futswetsweng jwaleka wona. Ke batla o entsweng ke matsoho a Modimo, oo malwetse le mahloko le lefu di o balehang. Jwale, le hopole mohla A mpitsang, ke—ke tla ba ke itokisitse, ka mohau wa Modimo, ke dumela jwalo, “Mohla motlotlwana wona wa lefatshe o senyehang, re na le o re emetseng,” oo re kenang ho wona, oo re sa tlo hlola re shwa ho wona.

⁵¹ Le ka rata jwang ho phela ka hara sena? E seng nna. Kgele ke... Re tlii tswa ho wona, mme ke thabetse seo. Mme sefi sena sa kgale sa motho se tshwasang mahloko, seo re phelang ho sona, sefi sa lefu le eng hape, mefehelo le mahlab a ka hara sona, le botsofadi. Mme, kgele, kgidi, ke mang ya batlang ho dula mmeleng o jwalo? Nna, ke thabetse ha o mong o tla tla. Re na le mmele oo—oo o ntseng o lokisetswa rona, Kganyeng. Mme hang ha bophelo bo tswa lehahleng lena la kgale mona, Moya wa Bosafeleng wa Modimo o phelang ka hare, o nka leeto ho ya kena tabernakeleng eo kwana, mme teng o phela ka Bosafeleng. Hobaneng re ka batla ntho e kang ena? Kgele! E, monghadi. Oh, ke—ke thabetse hoo, hore mono, Modimo o teng O totobatsang dintho tsena tsohle.

⁵² Mme re sheba mona, re di bona e le diriti feela, le hona. Rona re seriti. Ke ne ke shebile sefaleng mona, ke bone monna ya tsamayang, mme ka sheba ka ntli seterateng mme ke bona banna le basadi ba tsamayang. Ba na le bophelo, empa e ke ke ya eba Bophelo ba nnete, hoba bo na le lefu ka ho bona. Mme—mme Davida o itse, “Nka tsamaya kgohlong ya moriti wa lefu.” Jwale, moriti o boptjwa ke bokaalo ba lesedi. Lesedi le le kaalo le lokela ho ba teng. Ha e le lefifi kahohle, moriti o ke ke wa botjwa. Le a bona? Lesedi le le kaalo le lokela ho ba teng, lefifing, ho bopa moriti. Be, jwale taba ke hore o itshetlehile ka lehlakore lefe ho ao.

⁵³ Ke ye ke bone monna a tsamaya, mohlankana a motjha; dilemo tse mmalwa hamorao, ako shebe moriri wa hae kamoo o pudufalang mme o hlotheha, le mahetla a nyebella. Ngwanana e motle ya emeng, ya tshobotsi e mosa, e halalelang, mme a ema

a rorisa Modimo; mme ke kgutla dilemong tse mmalwa mme ke mo fumana mahetla a nyebelsetse, a pepile bana ba babedi kapa ba bararo. Be, kgele, hoo ho supa lefu le leng teng mmeleng oo. Ho sa tsotellehe kamoo o leng motle kateng le kamoo o leng motle, o sa na le lefu ho wona.

⁵⁴ Jwale ke sheba moo moya o ka mono o sekamelang teng. Ha o dula o bonahatsa Lesedi, o bua ka Lesedi, o qoqa ka Lesedi, o tla tsamaya le Lesedi. Empa ha o dula ka lehlakoreng le leng, la lefatshe, dintho tsa lefatshe, o tshwaetswa ke lefatshe, ha ho letho le o saletseng haese ho fetoha lefifi mohla o shwang, kwana lefifing le ka ntle. Ka baka leo o a bona, seo re leng sona, re tshwanela ho hopola hoba re seo re leng sona ka mohau wa Modimo, mme ha ho ya ka ithorisang hara rona. Re ka mpa ra inama ka hlompho le ka boikokobetso, pela Modimo, le ho Mo boka ka baka la ho loka ha Hae.

⁵⁵ Mme re a fumana morena enwa ha feela a ne a ikutlwa jwalo, Modimo o no o mo hlohonolofatsa. Empa hoba a fihle moo a sa batleng ho dula pitsong ya hae, yaba o batla ho nka pitso ya motho e mong. Mme a re ka ho yena, erekaha Modimo a mo hlohonolofaditse, ho itoketse, a ka etsa seo.

⁵⁶ Empa ka bomadimabe re etsa diphoso tseo! Ho hobe, hakakang! Wena, o tshwanela ho tshephala ka nnete. Ha o a tshwanela, ha o a tshwanela ho etsa letho Modimo a sa ka a o tataisetse ho lona, mme sena se a paka, mme se a netefatsa, mme ke wena ya tsebang hore Modimo ke wona o e entseng.

⁵⁷ Ka tlwaelo, monna wa Modimo, Modimo o tlameha ho mo qobokisa le ho qhautsa monna wa nnete wa Modimo. Ha se mathaka ao a batlang ho hongata ho sebetsa haholo ka yona, ho thata ho bolela seo ba tla se etsa ha ba se fumane. Le a bona? Empa ka tlwaelo Modimo o tlameha ho tshwasa monna wa Hae, jwaleka Moshe, le Pauluse, le ka tsela eo, ho mo qobokisa, ho fumana kganya bophelong ba hae, le ho mo fetola motlamuwa wa Moya o Halalelang.

⁵⁸ Jwale re a eellwa hore, morena enwa, mme ntho e nngwe e re ithutang yona mona ka Osiase, ke hore, eitseha a kgalengwa ke monna ya filweng boholo ba ho kena ka dibano, monna ya kgethetsweng mosebetsi. Eitseha a mo kgalema, a mo halefela.

⁵⁹ Oh, ke thohako e kakang—e kakang eo! Ha monna a leka ho lemosa molekane hore o phoso, mme o mo pakela yona ka Lentswe la Modimo, “O phoso.” Mme monna eo, kahobane a ikutlwa a ka etsa se a se batlang, mme a sa batle ho ikokobeletsa Lentswe, ebe moo a halefang.

⁶⁰ Le eellwa se hlahetseng morena? Lepera la siphoha sefahlehong a sa halefile. Lepera la otla Osiase sefahlehong, mme baprista le ba moo ba le bona, mme ba mo kgarameletsa ntle ho tempele, mme a shwa, e le molepera. Bophelo bo boholo boo bo qadileng hantle hakana, ba qetella e le molepera, mme

a lelekwa, mme a tlameha ho phela tlung e ka thoko a nnotshi, matsatsi wohle a bophelo ba hae, monna eo Modimo a kileng a tshwaetsa bophelo ba hae.

⁶¹ Nka bua tjena, ka hlompho. Kajeno re fumana monna tshimong, mohlankana, le monna wa dilemo tse hare, monna ya hodileng, ya qadileng a matha hantle, mme a leka, mme a kgahlisa Modimo pontsheng. Empa re ba fumana, kajeno, ka ntle kwana, e le makgoba a tahi, mme ba katlehire, ba le ka ntle koo, hole le rona. Bang ba bona ba wele mohaung, ka botlalo. Bang ba bona ba se ba hlanyetsa tjhelete, bang ba bona ba hlanyetsa basadi mme ba nyetse basadi e beng e se mafumahadi a bona. Le—le dintho tsohle le dihlong tse hlahileng, phutheho e nngwe le e nngwe ya bodumedi. Rona, re ke ke ra beana dibata, hoba bohle re molato, kaofela, kapa phutheho ya bodumedi ka nngwe. Re fumane monna ya jwalo, ya kileng a tshwaetswa ke Modimo mme a ena le tshwaetsa e kgolo bathong. Mme kwana mohla ba ne ba ikutlwba nonne pelo...

⁶² Ha monna a fihla moo a ka tshwaetswang nqa ho Modimo, o tlameha ho ikokobetsa, ka dinako tsohle, kamehla.

⁶³ Mme re a fumana, morena enwa o shwele ka sekgobo, e le molepera. Hape, ebole thuto ho moporofeta e motjha enwa, ho se tshetlehe tshepo tsa hae hodima monna, empa ho sheba ho Modimo a nnotshi. Hoba a qale ho sheba monna e le mohlala, monna enwa a hloleha, leha kwana e ne e le monna ya lokileng.

⁶⁴ Ka hona eo ke thuto ho rona, bosiung bona, ho tshetleha mehopolo ya rona ho Modimo, ho sa tsotolehe ke monna ofe. E ka bang khadinale, moprista, moporofeta, seo a ka bang sona, o tshabelwa ke diphoso le—le ke tshito, esita le lefu, le sebe. Empa e Mong ya jwalo O teng, mme yena ke Jesu Kreste; ke Yena Eo.

Ka sena, Esaia a ithuta thuto, hore Modimo ke wona o tlotsetsang monna wa Wona madulo.

⁶⁵ Ha ho monna ya nang le tokelo ya ho ema mme a re, “Be, nka phela habobebe ha nka ba moruti. Ke a kgolwa nka ithuta molaetsa. Ke a kgolwa nka etsa *sena, sane*, kapa se *seng*. Ke a kgolwa ha nka qopitsa neo ena eo Modimo a e abileng, e ka...Nka epa matsholo a maholo, le jwalo-jwalo.” Re e bona e jele setsi haholo kajeno.

⁶⁶ Empa ha o ka lemoha, mona Esaia a ithuta thuto, hore Modimo ke wona o tlotsang monna wa Hae, ka Boyena. Modimo ke wona o hlomamisang, mme ha se Yena ya behileng monna enwa moprista. O mo entse morena, mme o tlameha ho dula e le morena. Ha tshwanela ho—ho leka...Mona Esaia a ithuta hoba ha o a tshwanela ho leka ho nka setulo sa monna e mong.

⁶⁷ Yare hobane a bone mohale wa hae e moholo a wela sekgobong sena mme a theoha a shwa, Esaia a ikutlw a batla a lahlehetswe ke ditshepo tsohle, ka hona a theohela tempeleng ho ya buisana le Morena, mme ke hona moo pono e hlahileng teng. Tempeleng, a bona Ya na tshwanetse ho sheba ho yena ka dinako tsohle. Ka tempeleng, yena, a bona, ponong, Modimo a dutse teroneng e phahameng, e phahame hodimo kwana Mahodimong, mme mophetho wa Hae o Mo teetse hare. Pono ena a e boneng, hodimo, a phahame, terone ya Hae, e le hodimo kwana hodima mmuso wa lefatshe. Modimo, keha a loketse ho sheba Yena, mohla a bonang pono.

⁶⁸ Mme re ntoo elellwa sena, hore Dirafime tsa Lehodimo di ne di rurela morao le pele, ka tempeleng. Jwale, Dirafime, ka tshwanelo lentswe la Seheberu mono ke *Dihotetsi*. E ne e le Tsona Tse hlahisang dibano le sehlabelo. E mpa e le bolaodi bo fetang ba Mangeloi, bo-bo betlelang moetsadibe tsela, ha feelsa sehlabelo se le teng. Mme Dirafime tsena, ka ho kgetheha, Dihotetsi tsena di filwe ofeisi e ikgethang, di dula hantle ka pela Sefahleho sa Modimo. Di jwaloka Kerubime, mme di ne di le ka pela Sefahleho sa Modimo hantle.

⁶⁹ Mme hoba moporofeta enwa a utlwe Moya wa Modimo hodima hae, mme, a bula mahlo a hae. Le a bona, o ne a tswaletswe morero oo, hoo eitseng ha a bula mahlo a hae, ya ka o tshethema a tloha mona a theohela lefatsheng mokana a lora, mme a bona terone ya Modimo e phahamile hodimo kwana. Mme yaba o sheba ka tempeleng, mme Dirafime tsena di rurela morao le pele, ka tempeleng, di howeletsa, “O a halalela, o a halalela, o a halalela, Morena Modimo! O a halalela, o a halalela, o a halalela, Morena Modimo!”

⁷⁰ Phetoho e kakang, mme ya eba tshwaetso e kakang ena hodima moporofeta e motjha enwa! Hoba a bone mefokolo ya monna, mme leha kwana e le monna ya lokileng a ka hloleha, empa jwale o bona Modimo, mme a bona Dirafime tsena.

⁷¹ Mme le hlokomele lesira le ikgethang la Dirafime tsena. Di ne di ikwahela difahleho ka mapheyo a mabedi, ka mapheyo a mabedi di ikwahela maoto, mme di fofa ka mapheyo a mabedi. Modimo o halalela kahohle-hohle. Nahanang, esita le Mangeloi a tlameha ho ikwahela difahleho tsa wona tse halalelang, ho ema ka pela Sefahleho sa Modimo.

⁷² Ke a ipotsa, moena wa ka, ke a ipotsa, kgaitseki wa ka, hola re ka sheba taba eo! Hodima, Mangeloi a halalelang a tlameha ho ikwahela sefahleho, ho ema ka pela Sefahleho sa Modimo, ka tshabo le ka hlompho. Empa kajeno re fumana batho esita, le ba ipitsang Bakreste, ba sa hlomphe Modimo ho hang, kapa Lentswe la Hae, kapa batho ba Hae, kapa molaetsa

wa Hae, kapa le letho. Ebe tsohong ba tla ema kae? Bibebe e itse, “Ekare ha ya lokileng a bolokeha ka thata, moetsadibe le bakgopo bona ba tla ema kae?”

⁷³ Athé hape, Dirafime, bolaodi bo fetisang ba Mangeloi, hantle pela Setulo sa Mohau, Dihotetsi tsa sehlabelo, di ne di loketse ho ikwahela difahleho tse halalelang, ho ema ka pela Sefahleho sa Hae, mme E ne e le tsena. Modimo o no o dutse hodimo kwana teroneng ya Hae, mme Dikerubime tsena di ya morao le pele, di howeletsa, motsheare le bosiu, “O a halalela, o a halalela, o a halalela, Morena Modimo!” Na le tseba seo ke se bolelang? Lemohang. Tsona, mapheyo a mabedi, di ne di ikwahela difahleho. Mme hobaneng?

⁷⁴ Kajeno re a eellwa, hore, hobane batho ba le...ha ba sa na tshabo. Ba tla kerekeng, batho ba tla kerekeng, mme—mme ba saohe, mme ba tshehe, ho bua, ho soma, ba dutse hantle moo Evangedi e rerwang teng, tshabo e le siyo ho hang. Mme ba kopane le wena seterateng, mme ka...Ha o sa lebeletse hlompho ya letho ho tswa bathong; ha re a tshwanela ho etsa jwalo. Empa bonnyane ho—ho supa seriti sa Bokreste le hlompho bathong, ho re, “Dumela, moena,” kapa seo o se batlang. Bang ba bona ba howeletsa feela, “Hela, Moreri!” Oh, ha se le bosawana.

⁷⁵ Hopolang, Jesu o itse, “Kamoo le etsang bana kateng, le etsa ho Nna. Ya Nkamohelang, o amohela Ya Nthomileng. Mme ya amohelang eo Nna Ke mo romileng, o amohela Yena. Le a bona, seo le se entseng ho bona, le se entse ho Nna.”

⁷⁶ Mme ho hloka tshabo, na le tseba se e leng sona? Ke ntho...Ha ba fihlelwé ke maikutlo a Sefahleho sa Modimo. Lefatshe le nyehlile hona—hona, mme borapedi bo notong e tlase hona, ebole hlompho e fedile, esale ho le jwalo kamehla.

⁷⁷ Shebang masole ao. Re ka nahana, bosiung bona, ebole tlotollo le ntho e nyarosang hakae hore masole kwahele sefahleho sa Morena Jesu ka—ka sekatana, ho soma Boporofeta ba Hae le tsebo ya merero ya pelo. Ba kwahela sefahleho sa Hae ka—ka sekatana, mme ba Mo beha lebaleng le ka ntle, le ho tshwara molamu ba Mo tlera hloohong, mme ba nto o neeletsana, mme ba re, “Ha O le moporofeta, porofeta jwale, re jwetse ya O batileng.” Le a bona, ha ho hlompho ho hang. Ha ba ka ba utlwa matla ho hang.

⁷⁸ Empa mosajana eo, a bileng le tumelo e lekaneng ho ama seaparo sa Hae, o ne a fumane ditabatabelo tsa hae. Le a bona, re tlamehile jwalo, re tlamehile ho ba le maikutlo a Boteng ba Modimo.

⁷⁹ Dithusakutlo tse nyenyane tsena tse hlano tseo re phelang ho tsona, ke lefatshe la rona le le nyenyane. Le a bona? Empa

Modimo... Ke ho re, re mpa re di filwe ho hokana le lehae la rona la lefatshe. Empa ho na le dithusakutlo ka nnqane ho moo, ditekanyo tse ding.

⁸⁰ Mme Modimo o teng kamehla yohle. Hola feela re ka hopola hoo. "Mangeloi a Morena a lara pela ba Mo tshabang." Ka mohahong wona, bosiung bona, ho eme Jesu Kreste. Ka mohahong wona bosiung bona ho eme makgotla a Mangeloi, dikete tsa wona di larile ka mathoko. Ha le a bone, empa o ka utlwa tshusumetso ya wona, e o bolellang hore A teng mona. Haeba ho se jwalo, Lengolo ha le a nepa. Mme haeba Lengolo le sa nepa, e tla ba Modimo ha a nepa. Bibele e boletse, ho re, "Mangeloi a Modimo a larile," ha a suthe, "a haufi le ba Mo tshabang."

⁸¹ Jesu o itse, "Moo ba babedi kapa ba bararo ba kopaneng ka Lebitso la Ka, Ke tla ema hara bona." Ka hona hoo Mmea lefatsheng leo re sa le boneng, leo dithusakutlo tsa rona tse hlano di sa kgoneng ho hokana le lona. Jesu Kreste o mona, o teng. Hola re ka ba le boikutlo boo!

⁸² Mme, le hopole, e seng mona feela, empa ha o theosa ka seterata, hohle moo o leng teng, lona ba ipolelang le le badumedi mme le tshaba Morena, le hopole, Mangeloi a Modimo a ntse a tsamaya le lona hohle moo le leng teng. A shebile sohle se o se etsang, mohopolo ka mong o fetang kelellong ya hao, mme a tseba tsohle ka wena. Ka hona, re tshwanetse ho ba le boikutlo ba taba eo.

⁸³ Ha re sa e lemohe, ke moo o itshwarang ka tsela efe feela. Ka baka leo batho haholo, kajeno, boholo ba batho, ha ba lemohe Boteng ba Morena Jesu, ke ka hona (bona) re fumanang dintho tse etsahalang hona jwale, tse sa lokang.

⁸⁴ Holane re ka sebetsa ho latela polelo ya Davida, "Ke beha Morena pela ka kamehla." Oh, ke rata hoo. "Morena o pela ka kamehla. Moo A yang teng, ke a latela. Mme ke lemoha hoba hohle moo ke yang teng," ka mantswe a mang, Davida o na re, "Morena o tsamaya ka pela ka."

⁸⁵ "Nke ke ka o tlohela leha e le ho O furalla le ka mohla," Jesu o boletse. "Bonang, Nna ke na le lona kamehla yohle, ho isa bofelong ba lefatshe." A ke ke a re tlohela. O tshepisitse ho se etse jwalo.

⁸⁶ Seo ke sepheo sa dikopano tsena. Mme ke sona sepheo, baena beso, sa ho tshwarela molaetsa wa ka thoko le diphutheho tsa bodumedi, ke ho leka ho dumella batho ho bona hoba Jesu Kreste o sa phela, O teng mona, ho modumedi ka mong, phuthehong e nngwe le e nngwe ya bodumedi e tla dumela ho Yena... kapa bathong ba ka hara phutheho tsa bodumedi. "Morena o pela ka," Davida o boletse, "mme nke ke ka sisinyeha ke hona."

⁸⁷ Elellwang jwale, ka mapheyo a mabedi a ikwahela sefahleho, ho ema ka pela Sefahleho sa Modimo, hoba e le hona moo a na sebeletsa teng.

⁸⁸ Mme efela haeba a loketse ho ikwahela difahleho tse halalelang, ho sebeletsa Modimo, moreri eka kgona ebe motho wa mofuta ofe? Kamoo re tlamehang ho ikwahela sefahleho, ka dihlong! Kamoo re tlamehang ho phela kateng! Modimo o halalela kahohle-hohle. Re tshwanelo ho lemoha, ka dinako tsohle, ho hopola seo. Kathoko ho mohau wa Modimo, re baetsadibe ba hlobotseng, empa fale Madi a Jesu Kreste a re hlatswa sebeng.

⁸⁹ Jwale ka mapheyo a mabedi di ne di ikwahetse maoto. Hoo ho lekanya boikokobetso.

⁹⁰ Jwaleka Moshe, Moshe o ne a sa ikokobetsa hakaalo hofihlela a kopane le Modimo sehlahleng seo se tukang. Empa eitseha a bona hoba oo ke Modimo, le kahobane Lesedi lena le boletse lentswe la tshepiso. Le a e tshwara na? Ba tsebile, le yena Moshe o tsebile, nako ya tokoloho ena e haufi. Mme Boleng bo mohlolo ke bona bo theoha, mme bo boela bo phetha, mme bo re, “Ke hopola tshepiso ya Ka ho Abrahama, Isaaka, le Jakobo.” Mme Moshe o rola dieta tsa hae, boikokobetso, motheo wa hae wohle. A rola dieta tsa hae.

⁹¹ Pauluse, eitse ha a bona lona Lengeloi leo la Lesedi ka hodima hae, mme a le bitsa “Morena,” o na wele leroleng la lefatshe. O ile a hlokomela. Boikokobetso, “Ha ke sa le letho!”

⁹² Ha ho makatse Esaia a howeeditse, “Ho madimabe nna, hoba ke bone Morena Modimo wa makgotla.” Leha kwana, e ne e le moporofeta!

⁹³ Mme leha, Pauluse e ne e le monna wa motonana, moithuti, empa yareha a kena ka pela Sefahleho sa Modimo, a ikokobetsa.

⁹⁴ Mme Moshe eitse ha fihla ka pela Sefahleho sa Modimo, a ikokobetsa. E ne e le moporofeta. O ne a hlompha Modimo, Lentswe.

⁹⁵ Elellwang Johanne Mokolobetsi. Mohla Johanne a emeng lebopong, hoba a kolobetse batho, a sheba koo mme a bona lona Lesedi leo le theoha Lehodimong. A howeletsa, “Bonang Konyana ya Modimo e tlosang sebe sa lefatshe.” Mme yareha a ikokobetsa, keha le yena Jesu a tswa a kena metsing, pela hae.

⁹⁶ Jwale tsatsi le leng ke botsitswe potso ena. E ka tshoha e hlaha kelellong ya hao. Mohla Jesu a kenang metsing, mme Johanne a re, “Ke lokela ho kolobetswa ke Wena, mme O tlelang ho nna?”

⁹⁷ Jwale, moena ka wa kgale wa Baptise, Ngaka Roy Davis eo, o ne a mpolelle. O ne a mpee matsoho mohla a ntlotsang kerekeng ya Boromuwa ya Baptise. A re, “Billy, se neng se

etsahale . . ." Ka mmotsa ka yona. A re, "Se neng se etsahale ke sena. O a bona, Johanne o ne a eso kolobetswe, ka boyena, ka hona Jesu o ile a kolobetsa Johanne. Mme yaba Johanne o a kgutla mme o a busoletsa, o kolobetsa Jesu, hoba Jesu a ne a ke ke a kolobetsa Johanne pele Yena a kolobetswa." Be, ka e hopola e utlwahala hantle.

⁹⁸ Empa tsatsi le leng, dilemo tse ka bang pedi tse fetileng, ka ntle kwana merung moo ke neng ke dutse teng, Moya o Halalelang o ile wa theoha, Lesedi, mme yaba ke bona taba eo, mohla A neng a e senola.

⁹⁹ Jwale se e leng sona ke sena. Le a bona, batho ba babedi ba bohlokwa-hlokwa lefatsheng ke bao: Johanne moporofeta e ne e le eo; Jesu Messia e ne e le eo. Mme bao, bobedi, monna ya na tshwere molaetsa wa letsatsi, ba kopana sefahleho le sefahleho ka metsing, mohla mahlo a bona a ne a kopana. Mme Johanne, ka boikokobetso, a hla a re, "Ke hloka ho kolobetswa ke Wena, mme O tleland ho nna?"

¹⁰⁰ Jesu o itse, "Ntumelle ho be jwalo." Ke hantle. "Empa eka kgona rona, kapa re loketse . . ." *Eka kgona* ke ho bolela "loketse." "Re loketse ho phetha hohle ho lokelang." Hobaneng? Jesu e ne e le Modimo; Johanne e le moporofeta. Jesu o tsebile hang ha A rialo, Johanne kaha e le moporofeta eo Lentswe le tlang ho yena, o tsebile hobane o tla utlwissa. Hobane, sehlabelo, ho latela molao, se lokela ho hlatsuwa pele se nyehelwa. Mme Jesu o ne a loketse ho kolobetswa pele a nyehelwa. O itse, "Ntumelle ho be jwalo jwale. Ke hantle. Hoba re loketse jwalo, eka kgona rona, re phethe hohle ho lokelang."

¹⁰¹ Oh, hola re ka kakatleta thero eo metsotso e mmalwa! Haele moo re bona kajeno, jwaleka—jwaleka badumedi Leseding horeng eo re phelang ho yona, re loketse ho phetha hohle ho tshwanelang. Kereke ya pentekosta e loketse jwalo, re phethe hohle ho tshwanelehlang, haele moo re bitsitswe ke Moya o Halalelang. Ha se tshwanelo ho ikarola baeneng ba bang. Ha se tshwanelo ha re ipopa phutheho mme re sa batle ho amana le moena wa rona ya amoheitseng Moya o Halalelang jwaloka rona. [Sekgeo lebanteng—Mong.] Ha se tshwanelo ho rona. Ha re bona Modimo a nka kgato mme a sebetsa, mme A etsa hantle se a se buileng, mme kahobane motho a sa ikamahanye le mokgatlo wa rona, ebe re itshwara hampe, boo ha se botle. Ha se hantle.

¹⁰² Re lokela ho ba Bakreste. Re lokela ho ba banna ba mekgwa e metle. Re lokela ho ba batho le banna ba tshabang Modimo. Re lokela ho itokisetsa ho ntsha letsoho le ho tsukutla letsoho la monna, le ho otlolela kobo lephakong la moalo wa hae, le yena. E, hoba re loketse jwalo ho phetha ho lokelang hohle. Jwale re a tseba e . . .

¹⁰³ Ka hoba E ne e le Sehlabelo. Mme Johanne o e tsebile, hoba o bone Lesedi leo hodima Hae. Mme Johanne a ikokobetsa, e le monna e moholo hofihlela horeng eo. Empa ha a bona Morena Jesu e moholo enwa a e tla, a re, “Ke hloka ho kolobetswa ke Wena.”

¹⁰⁴ Empa eitseha A mo laela, “Re loketse ho phetha ho lokelang hohle.”

¹⁰⁵ Yaba Johanne o a fetoha, a tseba, ka hoba e le mohlanka wa Modimo, ka hoba e le moporofeta, o tshwanela ho phetha Lentswe la hora eo, hoba o Mo tsebile e le Sehlabelo. O sa ts哇 rialo, “Ke eo Konyana ya Modimo, Konyana ya sehlabelo e tla tlosa dibe tsa lefatshe.” Mme Konyana ya lokela ho hlatsuwa letsheng pele e bewa pela moprista. Amen.

¹⁰⁶ Re loketse ho phetha ho lokelang hohle, ha o nka Lebitso la Jesu Kreste. Monna ka mong kapa mosadi, ya nkang Lebitso la Jesu, a ke a tlohele sebe.

¹⁰⁷ Kajeno maipolelo a rona a fetohile e—e ha-ke-tsebe-eng, selotho sa mofuta kapa nyee. Re a theoha re rapela thapelo ya metsotso e ka bang mebedi, re ntso ema; re etse phoso e nngwe, re re, “O Morena, O a tseba ke ne ke sa ikemisetsa ho e etsa, empa, alleluia, ke itoketse,” ebe o a ikela. Tjhe, ha se yona, moena.

¹⁰⁸ Tshwabo ya hao e tlameha ho ba ya kgalalelo. O tlameha ho ipolela ntho eo. O tlameha ho e lokisa. O ke ke wa e etsa...Jesu o itse, “Ha o ya kgumama aletareng, hopola moena ya o sitetseng, e ya ho yena pele o hlahisa nyehelo ya hao mona, o boelane le moena.” Le a bona? Re loketse jwalo, rona, ho phetha hohle ho tshwanelehang.

¹⁰⁹ Le lona basadi ba meriri e bokopa, e ponngweng, le a tseba keng? Le loketse ho hodisa moriri wa lona le itshware sefumahadi. Lona ba aparang dishoto; di hloboleng, le apare mese. Le loketse ho itshwara jwaloaka Bakreste, ke hantle, hoba Bibele e itse hoo ke phoso. Mosadi ha a lokela ho etsa jwalo.

¹¹⁰ Mme wena monna ya tsubang disakrete, ha o a lokela. Le wena monna le dumellang basadi ba lona ho etsa seo, ebe le itlaleha le le “bara ba Modimo,” monna?

¹¹¹ Kano e kgolo, e kgolo e annweng moketeng wa lenyalo, “lerato, tlota, le kutlo,” e fedile. Amerika, mosadi o na le tokelo-ya-tsela. Be, o na le tokelo-ya-tsela hohle. Bibele e mmoletse a tla e fuwa jwalo.

¹¹² Ba tlaleha basadi ho ba bakganni ba bolokehileng ho feta bao re ba fumanang naheng. Ke phoso. Nna le mora wa ka, ha re parola naha, morao le pele, re ngola bukeng, ka nako ha kotsinyana e hlahile pela tsela, ha e le monna re ngola

tlasa monna, le mosadi tlasa mosadi. Mme tlasa dikotsinyana tse makgolo a mararo na ha bophara, makgolo a mabedi le mashome a robedi a motso o le mong e le basadi.

¹¹³ Tsa bona di tshetlehilwe hodima eng? Ka baka la ditlaleho tse kenang. Ehlide, matseka ao ha a tshware basadi ba batle bao ha ba fumane dinomoro tsa mohala. Ba ke ke ba ba porota. Ba ba tlolahela, mme ke ka lebaka leo.

¹¹⁴ Le a bona, le fetohile lefatshe la mosadi. Bibebe e boletse le tla ba jwalo. Ka nepo. Moreri sefaleng o batla a itshwanela, o tshaba ho bua letho kgahlano le yona.

¹¹⁵ Empa re loketse ho phetha ho lokelang hohle. Kae-kae e tlameha ho buuwa. Mona ha o shebe seriti le botumo ba hao. Wena o—wena o motlamuwa wa lerato wa Evangedi ya Jesu Kreste, mme o tlamehile jwalo. O motlamuwa wa Hae, mme o se buwe letho haese se buuwang ke Moya o Halalelang, mme o rera se lokileng. Hantle. O fetohile motlamuwa wa lerato ho Yena. Ha o tsotelle se e leng sona, o tlameha ho phetha ho lokelang hohle. Moreri o tlameha ho bua seo, haholo lona batho ba Pentekosta, ba—ba tsebang hantle ho lesa—lesa taba eo e iphetela mohwalotso.

¹¹⁶ Jwale nakwana e fetileng mona, monnahadi ya tummeng o tlide ho nna, a re, “Ha o tlohele basadi bao keng?” Ho re, “Tloo kwano, ke batla ho o bea matsoho ke o rapelle, o tlo tswelepele, mme o tswelepele ho rapella bakudi.” Ho re, “Kgele, batho ba o nka o le moporofeta.”

Ka re, “Nna ha ke eso re, ke moporofeta.”

¹¹⁷ A re, “Empa batho ba o nka jwalo.” Ho re, “O tlamehile o be o ruta batho bao ho amohela dineo tse kgolo tsa moyo.”

Ka re, “Ke bona bothata ba kereke kajeno.”

¹¹⁸ Ho re, “E seng ho ba bolella o re ba poma moriri wa bona, le *sena*, *sane*, se *seng*. Ke . . .” Ho re, “Ó tlamehile o be o ba ruta dinthohadi, tse phahameng.”

¹¹⁹ Ka re, “Nka hla ka ba ruta algebra jwang athe ha ba tsebe di ABC tsa bona?” Ke hantle.

¹²⁰ O tlameha ho qala kae-kae, ako qale maotong o ntoo haha o nyoloha. O se leke ho qala hloring; ha o na motheo wa letho. Mme ke bona bothata kajeno, baena, ha ba nke taba Ena, “Re loketse ho phetha ho lokelang hohle.”

Jwale lemohang Mangeloi ana jwale.

¹²¹ Mme Johanne Mokolobetsi, Pauluse, ba fapaneng, eitseha ba bona Kganya eo ya Modimo le Lesedi leo, ba Le kgumametse. Bao, e, ba Le hlomphile, ba Le tlolile, hobane ba ikokobetsa.

¹²² Mme Mangelo ana, esitile, le moreri eo ya ka pela Sefahleho sa Hae, a ikwahela maoto mme a ikwahela sefahleho. Oh, kgidi! Jwale elellwang, ka potlako jwale, A ena le mapheyo a mang hape, mme, ka wona, A tloha a nka kgato ya Hae.

¹²³ Jwale eo ke mosebeletsi e mokakang, wa Modimo, ya tsebileng, ho bontsha moporofeta kamoo mosebeletsi wa Hae ya itlhophileng a tlamehang ho ba kateng. Mosebeletsi ya ihlophileng o tlameha ho ba jwang? Jwale basebeletsi bana ba tadima... O ile a tadima e—e monna lefatsheng mona mme a bona phoso a e entseng, yaba Modimo o mmontsha mmuso Lehodimong, terone. Ke Yena eo re tlamehang ho mo tadima. Yaba O mmontsha seo mosebeletsi wa sebele a tlamehang ho ba sona, ya sebetsang ka pela Sefahleho sa Hae. Mme Dirafime e le tsena, le hona, di ikwahela difahleho tse halalelang, ho Ikwahela maoto, mme ka mapheyo a mabedi Tsa nka kgato; hlompho, boikokobetso, le kgato. Amen. Haeba e se mosebeletsi ya apereng hantle eo, ha ke tsebe seo e leng sona; hlompho, boikokobetso, le kgato. Oh, kgidi! Ke a o borella!

¹²⁴ Jwale ka mosajana sedibeng, mohla a elellwang neo ya Modimo, mme Monna enwa ya na bua e le Messia, e hlile ya mo nkisa kgato ka potlako. A ba a lebala nkgo ya hae ya metsi. A matha a kena motseng, a re, “Tloong, le bone Monna Ya mpoleletseng tseo ke di entseng. Na enwa ha se Messia?” Oh, kgele a hla a nka kgato ya tonana!

¹²⁵ Petrose, mohla A Mo nkang Lentsweng la Hae, jwaloka ha re buile hoseng hona, ka ntle koo sekepeng. Na le lemohile? Eitseha Petrose a nka Lentswe la Hae, mme a dihela letlowa mono, mme a tshwsa e—e dihlapi tse ngata, sehlopha sa dihlapi, Petrose a siya letlowa ka potlako a nka kgato. Pele a etsa, a ikakgela pela Morena, mme a re, “Tloha ho nna, oho Morena, ke motho wa moetsadibe.”

¹²⁶ Haeba e se mantswe a le mang ao, le a kang, ao Esaia moporofeta a buileng, “Ho madimabe nna, hoba ke bone Morena Modimo, mme ke motho ya melomo e ditshila.”

¹²⁷ Na ha le bone seo Boteng ba Morena bo se etsetsang badumedi ba sebele? Ebile ha re batle ho ipolela; re mpa re batla ho re, “Be, rona re Pentekosta, rona re Baptise, rona re Mapresbeteriene,” le tswelapele ka ho phela. Empa mosebeletsi wa sebele, ya bitsitsweng wa Modimo, o ikokobetsa ka pela Sefahleho sa Modimo. Ha a Se nyatse.

¹²⁸ Shebang ya nyatsitseng Morena Jesu ke mang, e ne e le Mofarisi, boraseng, ke bona ba Mo nyatsitseng.

¹²⁹ Empa monna ya na hlile a ratile ho ba mosebeletsi wa Hae wa sebele, a ikokobetsa mme a nka kgato. Jesu o itse, “Wena o Ntatele, mme Ke tla o etsa dihlapi tsa batho.” Hoba a bone eo ehlide e le Modimo, a nka kgato.

¹³⁰ Monna wa sefofu ya fodileng, Bibele e itse o ne a “tumise boholo ba Hae hohle naheng.” O ile a nka kgato mohla a fumanang hore Modimo o na le moemedi mona lefatsheng, ya na ka tutubolla mahlo a motho ya sefofu, mme a tsamaya a paka, a rorisa Modimo. Mme Bafarasi ba mo tshwara, mme ebe o ne a tla hlahelwa keng, le jwalekaha ke boletse hoseng hona. “Kgele,” a rialo, “ha ke kgone ho hhalosa, ho ngangisana le lona ka thutamodimo. Ke mpa ke tseba taba e le nngwe, ke ne ke sa bone, jwale ke a bona.” O ile a nka kgato, ruri, hoba o bille a tumisa boholo ba Hae hohle.

¹³¹ Mme, ka nako tse ding, o ka ba moreri, ya jalang boholo ba Hae, empa bophelo ba hao bo tla jala boholo ba Hae ha o ka phela hantle feela.

¹³² Bathwana bao Pentekosta, sehlopha seo sa batshwasi ba dihlapi le—le balekgetho, le ba jwalo, ba etsang mesebetsi e tlase. Ba nyolohetse koo ka tshepiso ya Modimo, mme ba lebella matsatsi a leshome phaposing e kahodimo. “Mme hang ho utluwa modumo o tswang Lehodimong eka moyo o fokang ka sefefo, ntlo eo ba dutseng ho yona ya ba ya tlala wona.” Mme ba nka kgato, hoba ba bone ho phethwa tshepiso ya Modimo. E ne e netefaletswe bona, tshepiso ya Modimo, mme ya ba nkisa kgato. Mohla tshepiso ya Hae e ne e phethwa, ya ba nkisa kgato.

¹³³ Motswalle, e re ke bue tjena. Seo re se boneng ngwahola kapa tse pedi, Mmusong wa Modimo, di tlameha ho nkisa Mokreste ka mong ya tswetsweng labobedi kgato. Empa lebaka la yona, ha re—ha re e hlomphe, ho elellwa hobane ke Modimo. Re a—re batla re tsilatsila. Re rata ho bona dinthwana, mme re hlahise tshisimoho. Re rata ho ikutlwa hamonate. Re rata ho etsa dintho tsena. Empa ho E hlompha kannete le ho E dumela ka pelo yohle ya rona, e re nkisa kgato.

¹³⁴ Be, mohla Lengeloi le kopanang le Maria hoseng hoo tseleng e yang sedibeng, mme la mmolella a tla “fumana lesea, a sa tsebe monna,” ya mo nkisa kgato. A titima kapele, a bolella mang le mang hore o tlilo “fumana lesea, a sa tsebe monna.” A se ke a tsotella seo e se bolelang hodima seo batho ba se buileng. O ne a hlide a kopane le Lengeloi la Modimo, mme taba eo ya mo nkisa kgato. A utlwa hore Moya o Halalelang o hodima hae, o ntse o bopa ka ho yena bophelo.

¹³⁵ Oh, hola feelsa re ka elellwa hoo, hore Moya o Halalelang o hodima rona, o ntse o bopa ka ho rona tumelo, ho leka ho Itlhahisa ka mekgwa e mengata e fapaneng le ka dineo, ho bopa tumelo Kerekeng e hlbwibilwang. E tshwanela ho re nkisa kgato. Empa ke a ipotsa na re etsa kamoo a e batlileng kateng, ka tshabo le ka hlompho?

¹³⁶ Topallo ya Mollo matsatsing ana a morao e tlameha ho nkisa kereke yohle kgato, E a netefatswa, dipontsho tsa ho Kgutla ha Hae di haufi.

¹³⁷ Israele e boetse lehaeng la yona. Jesu o itse, “E tle e re ha sefate sa feiye se hlahisa monoko wa sona, moloko wona o ke ke wa feta tsena di eso etsahale.” Mohla Israele e kgutlelang lehaeng la yona mme e ba setjhaba, moloko oo o tla bona ho Kgutla ha Messia.

¹³⁸ Ke amohetse seratswana sa rabbi wa Palestina, tsatsi le leng, se tsotehang. Ho na le sefatjana sa morara, monongwaha, se hlahileng Palestina se eso bonwe dilemong tse makgolo le tse makgolo le tse makgolo. Mme ba lepile, Bajode, hore mohla difate tseo tsa merara di hlahang hape, Messia o tseleng ya Hae.

¹³⁹ Banna ba bohlale ba tlileng ba tswa Babilona, mme ba ithutile dinaledi, e ne e le balepi ba dinaledi. Mme yare ba sa ithuta dinaledi, ba bona dinaledi tse tharo tsena di kolohana. Naledi tsa Kama, Sema, le Jafeta, tseo ba hlahetseng tlasa tsona, di kolohana, mme ba tsebile. Badumedi bao ba boramahlale ba ne ba ithutile makgotla a lehodimo, kamoo a tsamayang kateng, mme eitseha ba bona dinaledi tseo di kolohana hodima Jerusalema. Hoba, haeba ba ne ba le Babilona, ba ne ba shebile ba tobile Jerusalema ka kotloloho, nqa Bophirima, ho ka e bona. Mme eitseha ba e bona e kena, ba tsebile ha dinaledi tseo di kolohana moleng, Messia o ne a le lefatsheng. Kganya!

¹⁴⁰ Mme ha re bona Israele e kgutlela hae, mme le Moya o Halalelang o tshollelwa hodima dikereke, ditaba tsa kgobokano ya borapedi di a hlaho, le Lekgotla la Dikereke, le dintho tseo, mme Bokatolike ba Boroma le Boprotestanta di kopana mmoho, Messia o tilo tla a phamola Monyaduwa wa Hae.

¹⁴¹ Mme Modimo o romela dineo, ho leka ho bopa ka ho rona tumelo e tla re ntsha mona, tsatsi le leng, ho kena Hlwibilong; ho fodisa bakudi, ho tutubolla mahlo a difofu, ho tsosa bafu!

¹⁴² Mehlole e meholo e hlaho hodimo lehodimong, Mangeloi a kopana ka senkgome! Mme boramahlale ba e shebile, e lepilwe dikgwedi tse ngata pele e hlaho. Ke eo e hlahile. Ke eo e ka hara makazine. E boletswe dikgwedi pele e hlaho! Mangeloi a supileng a theoha, mme ha tshwe, “Sephiri sa Modimo se feletseng se tiisitsweng ha tshelela se tla manollwa.” Mme ke eo e hlahile kamoo A boletseng, e ne e boletswe pele e etsahala.

¹⁴³ Mme ba qamaka hohle, ba fumana masedi a makatsang a mefuta yohle, mme ba a bitsa dibopuwa tsa mofuta o mohlolo. Ba a bitsa dipirinki tse fofang, dipontsho tse nyarosang dipakapakeng, hodima lefatshe. Mehlole, mehlole e re supisang ha ho Kgutla ha Morena Jesu ho atametse.

¹⁴⁴ Jwale sefatjana sa morara se a hlaho. Israele ke setjhaba ka bosona. E theile setjhaba sa yona, folaga ya sona. Naledi ya kgale ya Davida e ntlha di tsheletseng, folaga ya kgale ka ho feta lefatsheng, e boetse e a fokaela, kgetlo la pele dilemong

tse ka bang makgolo a mashome a mabedi a metso e mehlano. Ba na le sesole sa bona. Ba na le tjhelete ya bona. Ba atametse haufi... ba na le kemedi Matjhabeng a Kopaneng. Ke setjhaba, kgetlo la pele dilemong tse makgolo a mashome a mabedi a metso e mehlano. Mme ere ba sa phuthehela ka hare...

¹⁴⁵ Ke tshwere teipi ya yona, setshwantsho, re se bitsa *Metsots E Meraro Pele Ho Kgital Ya Bosiu*. Mme mono, ba botsitse Bajode bana, ba ba kenya ka hare, maqheku, a pepilwe, ba a kakatletse. Ba re, “Na le tlide lehaeng ho shwa?” “Tjhe, re tlide ho bona Messia.” Amen. Ha le bona dipotso tseo, ke alamanaka-tshupanako ya Modimo, Messia eo o mothating wa ho hlaha. Oh, kgidi!

¹⁴⁶ Re tlameha ho ikokobetsa. Kamoo re lokelang ho ba le tshabo! Kamoo re lokelang ho nka kgato, ho leka ho pholosa moyo ka mong oo re ka o kgonang, ho hasakanya dipeo ho qala ho le letona ho isa ho le letshehadi, le ho etsa sohle seo re ka se kgonang.

¹⁴⁷ Empa sebakeng sa hoo, re re, “Kganya ho Modimo, ha ke ikutlwé ho ya bosius bona. Ke a kgolwa, be, ke a kgolwa ke tla itulela hae ke shebe kgaso ena ya thelebishene bosius bona. Ke tshebeletso ya thapelo, empa...” Kereke e robetseng, ya Laodisea, e ruileng! Oh, kgidi! Ke rona bao he.

E tlameha ho re nkisa kgato.

¹⁴⁸ Rona, jwaleka moporofeta, re bone ho tsoha boikakasso, diphutheho tsa bodumedi. Kajeno re bona hantle, ka kerekeng, se hlahileng, jwaleka Esaia ha a bone. O bone monna eo leha kwana Modimo a mo tlotsitse, empa re mmone, a mmona a ikakasa mme a otlwa ka lepera. Rona kajeno, re bona ntho yona eo, ya diphutheho tsa bodumedi tse ikakasang, “Re kereke e kgolohadi sehlopheng. Re na le ditho tse ngata ho feta ba bang bohole.” Boikakasso, ho bona lepera la ho se dumele ha le ba otla, mme ba lahlelwa kantle.

¹⁴⁹ Re loketse re be re ile ra sheba pono e tswang Lehodimong, e tla re bontsha Jesu Kreste hara rona, Lentswe la Hae la tshepiso hore O tla e etsa, e, monghadi, ho se tshwaetswe ke tsamaiso tsa batho, empa ho tshwaetswa ke Modimo ka Sebele.

¹⁵⁰ Re ba fumana, jwaleka Osiase, ba lesa ho tshwara Lentswe, hoba ba Le fapanyeditse ka ditumelwana, ba leka ho itshwantsha le Osiase wa kgale, ho leka ho inkela setulo sa ofisi e tlotsitsweng ka mora sefala, le ho lahla Lentswe la Modimo la nnete. Ha ba hlokahale ka morao ka mono jwalekaha Osiase a entse mono, aletareng eo, a tshwere dibano. Monna ya ipolelang e le Mokreste, mme a latola dikomelo tsa Lentswe, ha a hlokwe sefaleng jwaleka Osiase ka hoo—ka senonetso seo. Monna ya ipoletseng a kolobeditswe ke Moya o Halalelang, mme a

hlohonolofaditswe ke Modimo, mme a ka ema mme a latola Bibele eo le Nnete ya Yona, o E fapanyeditse ka tumelwana ka ho hong, o tletse lepera la sebe le ho se dumele jwaleka Osiase.

¹⁵¹ O ile a lelekwa ofising, empa ba leka ho tlatsa ofisi eo ka hlalefo. “Ke nna Ngaka Ph.D., LL.D. *Sekete-kete.*” Le a bona, ba leka ho e nka mme ba hloma thuto sebakeng sa tlolo ya Moya o Halalelang. Le a bona, ha ho le jwalo, monna a ka nka Bibele eo, mme setshahadi se itseng se ka e hhalosa mme sa e hasakanya, le ho e ala mona le ho e lolamisa ho o ntlafaletsa yona. Ke hlalefo eo. Ke kahobane a badile a ba a bala, ka dikgutlo tsena le dintho, kamoo a kopanang mmoho.

¹⁵² Empa e re ke o bolella taba. Modimo ha o theoha o kena Lentsweng la Hae, ha A le kopanye feela, O Le bonahatsa kantle mono le ho Le phedisa, le ho Le netefatsa le ho Le paka, hore ke Nnete. Ke nnete ya Lentswe eo. Ke mohla Modimo a buang ka Sebele.

¹⁵³ Pono e ile ya ama moporofeta. Oh, dikgahlamelotsa pono eo hodima hae! E susumeditse moporofeta enwa . . .

¹⁵⁴ Jwale, hopolang, esale a shebile monna. Empa eitse ha a bona ntho ya makgonthe . . . Esale a shebile bophelo ba monna ya halalelang, o mmone a hloleha, o mmone a otlwa ke lepera mme a eshwa. Le shebile ntho e tshwanang diphuthethong tsa lona tsa bodumedi. Na le bona moo e nngwe le e nngwe e ileng teng?

¹⁵⁵ Jwale motsamao o moholo wona wa borapedi. Haeba kereke e sa kena motsamaong wona, nakong ya—ya qomatsi, kereke eo e ke ke ya sebediswa jwaloka kereke. “Mme ha ho moreri ya ka sebeletsang motho, o tla bolaelwa hona. Haeba a hlohonolofatsa batho ba kantle, o kgema mmoho le motsamao wa borapedi.” Ehlide taba eo e ngotswe kajeno, ke Luthere; ke lebala lebitso la hae. Le a bona, ke hantle. “Kerekeng ya hao ha ho na ho rapelwa teng; e tla fetolwa setoro.” Na le bona letshwao la sebata le seng le sebetsa, mme re le shebile. Nako, oh, e tlameha ho nkisa kereke kgato. Ruri, e tlamehile jwalo.

¹⁵⁶ Shebang dikgahlamelotsa pono jwale, seo e se etseditseng moporofeta. E mo susumeditse ho . . . ka mora ho sheba monna eo, le ho e bona e hloleha. A bona Modimo a halefetse monna eo, mme a ikgula ho yena, mme a mo bata ka lepera.

¹⁵⁷ Yaba o theohela tempeleng, ho re, “Morena Modimo, ke a O tseba o Modimo. Mme esale ke shebile ntho e fosahetseng.” Mme yaba Modimo o hlahisetsa pono. Mme e se pono feela, empa pono e ne e netefaditswe; hobane, hara tsona ha hlaha Dirafime tse rurelang morao le pele, mme esita le mohoo wa Tsona wa reketlisa mohaho ha o kopana mmoho, metheo ya wona.

¹⁵⁸ Mme hape, le a bona, a bona ntho ya makgonthe. Mme, leha ho le jwalo, e ne e le moporofeta. E ne e le . . . E—e

moporofeta eo Lentswe le tlang ho yena. Empa a eso phollelse sedikadikweng kwana haese feela seo esale a se shebile, mohale wa hae, Osiase, a shebile moruti, e—e thaka le leholo. Mme eitse hobane a bone ho hlolleha mono, ha Lentswe, le ho bona Lentswe le kgalema monna kahobane a ne a hlwella ofisi a sa tlangwang ho e hlwella, yaba ho hlhang? O ile a lelala, mme a bona Morena.

¹⁵⁹ Le kgona ho bala pakeng tsa mola na? Na le bona seo ke se bolelang jwale? Morena Jesu ya tshepisitseng, “Jwaleka matsatsing a Lota, ho tla ba jwalo ho tleng ha Mora motho.” Wona Modimo o ngotseng Bibele, ho re, “Jesu Kreste yena maobane, kajeno, le ka ho sa feleng.” Mme O itse, “Ya dumelang ho Nna, mesebetsi eo Ke e etsang o tla e etsa le yena.” Le fumana seo ke se bolelang na?

¹⁶⁰ Yaba monna ya pelo e tshepehang eo o bona Kganya ya Modimo, a E bona e nkile kgato. Mme a howeletsa, jwaleka moetsadibe, mme a ipolela e le moetsadibe. A eso bone ntho e jwalo pele, e tiileng hakaalo, pele. A ipolela hore ke moetsadibe.

¹⁶¹ Yaba ho etsahalang? Eitseha moporofeta a itokisetsa ho ipolela, yaba ho fihla hlatsuo ya makgontshe.

¹⁶² Pele batho ba itokisetsa ho ipolela, ditshebeletso tsena tsa phodiso ha di hloke ho tshwarwa. Ha o ka ipolela dibe tsa hao, ho ipolela ho se dumele ha hao, ho ipolela tse phoso tseo o di etsang, Modimo a ka etsa ntho e nngwe. Empa pele maipolelo a etswa, hlatsuo e ke ke ya etswa.

¹⁶³ Mme hang ha Esaia a re, “Ho madimabe nna! Ke monna ya melomo e ditshila, mme ke ahile hara batho ba melomo e ditshila.” Yaba ho latela maipolelo, hoo, yaba Kerubime e tla ka Mollo. Na le lemohile? Modimo ha o a sebedisa sekolo sa thupelo ho mo hlatswa. Ha A sebedisa e—e buka ya ditaelo ho mo hlatswa ka yona. O mo hlatswitse ka Mollo.

¹⁶⁴ Modimo o hlatswa bahlanka ba Hae kamehla, ha A itokisetsa ho ba sebedisa, ka Moya o Halalelang le Mollo. Modimo o hlatswa ka Mollo; e seng ka dibuka, e seng ka thuto, e seng ka kutlwisiso ya hlalefo, e seng ka phutheho ya bodumedi. Ka Mollo wa Moya o Halalelang, ke ka wona Modimo a hlwekisang mohlanka wa Hae.

¹⁶⁵ Le ntano elellwa, ke hona, kamora maipolelo, kamora hlatsuo, ho latela thomo. Yaba ho latela thomo. Kamora boipolelo le hlatsuo, yaba moo Esaia ya hlatsuweng a arabelang Modimo, mme a re, “Ke nna enwa, roma nna.” Hob a hlatsuwe, a ipolele, a hlatsuwe ka Mollo, yaba Esaia ya hlwekileng o loketse mosebetsi. A loketse ho bewa mohlala. A loketse ho—ho bea bophelo ba hae pontsheng, ba bang ba tle ba tshwaetswe ke yena.

¹⁶⁶ Empa pele a ipolela, pele a hlatsuwa, e ne e le mohlala o fokolang, e le nkele-morohong wa morena.

¹⁶⁷ Jwale o hlatsuwe, jwale o ipoletse o hlatsuwe, le ho bitswa le ho rongwa ho ba moporofeta. Mme Modimo o mo dumeletse ho ngola Bibele yohle, Dibukeng tse mashome a tsheletseng a metso e tshelela tsa Bibele, dikgaolo tsa Esaia di mashome a tshelela a metso e tshelela. O qala ka Genese; Johanne Mokolobetsi o kena mahareng a Buka; mme o tlolela kwana pusong ya Dilemo tse Sekete, ho Esaia 65 le 66, ke hantle, Tshenolo. O ngotse kaletso yohle ya Bibele. Hobaneng? Hobane a ile a ikokobetsa mohla a bonang Boteng ba Modimo.

¹⁶⁸ O ile a etsang? Mme yena, hoba a etse jwalo, le ho ikokobetsa le ho hlatsuwa mme a beellwa kathoko, le ho hlatsuwa le ho rongwa, jwale o tshwaeditse dimilione tsa batho. Mona kahara Buka ya hae, Mongolo wa Esaia o tshwaeditse motho ho qala mohlang oo ho fihlela sena ke wona. Tshwaetso ya hae e sa tswelapele.

¹⁶⁹ Bibele e boletse, “Mesebetsi ya bona e ba sala morao.” Jwaleka Moya o Halalelang ha o boleletse Johanne, ka mono Tshenolong, kapa Sehlekehlekeng sa Patmose, “O sa ntse o tshwanela ho porofeta pela marena le ditjhaba le batho.” Buka ya Tshenolo e sa ntse porofeta. “Ba phomola mesebetsing ya bona, empa mesebetsi ya bona e ba sala morao.” Tshusumetso ba bileng le yona, e sa bas ala morao. Le a bona? Ruri, ke yona.

¹⁷⁰ Mme jwale, kajeno, re fumana ntho e tshwanang, ditshwaetso. Re tlameha ho tshwaetsa.

¹⁷¹ Pele re ka tshwaetsa, re tlameha ho elellwa Modimo, re tlameha ho hlweka, re tlameha ho ikokobetsa. Re tlameha ho ithoba, le ho tseba, ho o ikgopola le ho tseba kamoo wena o leng monyenyan. Ha o letho. Ha ke letho. Mme ha ho le a mong wa rona e leng letho, empa Yena ke sohle. O lokelwa ke thoriso yohle, oho Konyana ya Modimo. Seo re se hlokang ke ho kgutlela tempeleng, re hlokwa ho kgutlela aletareng ya Modimo le ho haha aletare ka dipelong tsa rona, moo re ka inehelang, re ntano bona Morena Modimo wa makgotla a theoha matsatsing ana a qetelo le ho etsa seo A se entseng mohla A ne a le mona pele. Ke moo le tla utlwisia, le ho howeletsa, “Ho madimabe nna!”

Ha leshala la Mollo le amile moporofeta,
Ho mo hlwekisa ka hlweko e tiileng,
Ha lentswe la Modimo le itse, “Ho tla ya mang
bakeng sa rona?”
Yaba o arabela, “Mong’ame, mona, roma
nna.”

¹⁷² Na ke nnete? [Phutheho e re, “Amen.”—Mong.] Ha re se bineng.

Bua, Morena ka, bua, Morena ka,
 Bua, mme ke tla . . . nkarabele kapele;
 Bua, Morena ka, bua, Morena ka,
 Bua, mme ke tla arabela, "Morena, roma
 nna."

Mamelang, metswalle.

Dimilione jwale di shwela sebeng le
 maswabing;

Utlwang sello sa bona se haulang se bohloko;
 Akofa, moena, akofa o ba pholose;
 Arabela kapele, "Mong'ame, ke nna enwa."

Jwale bua, Morena ka, bua, Morena ka,
 Bua, mme ke tla O arabela kapele;
 Bua, Morena ka, bua, Morena ka,
 Bua, mme ke tla arabela, "Morena, roma
 nna."

¹⁷³ Le a Mo rata na? [Phutheho e re, "Amen."—Mong.] Ha re inamiseng dihlooho tsa rona jwale, nakwana feela, mme re se binele ka marameng. [Moena Branham o qala a binela ka marameng.]

Leshala la Mollo le amile moporofeta,

¹⁷⁴ Ha re e bineleng ka marameng jwale. [Phutheho e binela ka marameng ha Moena Branham a sa ntse a bina—Mong.]

Ho mo hlwekisa ka hlweko e fetisang,
 Ha Lentswe la Modimo le re, "Ho tla mang
 sebakeng sa rona?"

Yaba O arabela, "Mong'ame, mona, roma
 nna."

Bua, Morena ka, bua, Morena ka,
 Bua, mme ke tla O arabela kapele;
 Bua, Morena ka, bua, Morena ka,
 Bua, mme ke tla arabela, "Morena, roma
 nna."

¹⁷⁵ Ntate ya Mahodimong, re emetse hlatsuo ho se dumeleng hohle, hoba ruri jwale dimilione di shwela sebeng le maswabing. Ho thusang, Morena, ho etsa jwalo, ha rona—ha re ipolela, re se na seo re ipolelang sona? Ho re thusa hakae ho leka ho inahanelia dihlalefong tsa rona hore ntho e etsahetse, athe re tsebisisa hantle hore ha e a etsahala? Ntata rona ya Mahodimong, re O rapela ho re hlwekisa jwale ho se dumeleng hohle, le dinthong tsohle tsa rona tsa bophelo tsa nama, re tle re hlwekiswe ke Madi a Morena Jesu.

¹⁷⁶ Sehlopha sena se mona Chicago, ka pono eo ya hoseng hoo, Morena, ke a tseba karolo ya Monyaduwa ya letileng e teng mona, mme ke mpa feela ke sa tsebe mokgwa wa ho e qhautsa, Morena. Ke mpa ke hasa dipeo hohle moo nka kgonang. Ke

a rapela, Modimo, ha bao ba le teng mona, bosius bona, ba—ba sa—ba se nang boiphihlelo bona, ba eso kgone ho bona ponahatso ya Mmuso wa nnete wa Modimo, ba eso utlwe ditholwana tsa wona, le ho bona maphelo a bona a nyalana le Lentswe lohle, mme ba kgona, le jwalo-jwalo; Morena, etsa bosiu bona ebe bosiu boo ba tla etsa jwalo. Fana ka sena, Ntate. Re rapela sena ka Lebitso la Jesu. Amen.

¹⁷⁷ Jwale ka tshabo. Ke—ke tiile le ntseba hantle, kapa ke tshepa jwalo. Hore ka ke lehlanya. Haeba ke le lona, ke—ke ha ke tsebe. Mme ha ke kgolwe Modimo o hlompha mahlanya. Dilemong tsena tsohle, eista le masimong, ntho e nngwe e tlamehile e be e etsahetse. Nna ke moena wa lona. Empa ke—ke dumela ka pelo yohle ya ka hore . . . Jwale nke ke ka re Morena o mpoleletse, empa ke dumela moloko wona o phelang jwale o tla bona Hlwibilo. E atametse hakaalo, ke a dumela. Ha ke bone letho lesele le tlang. Le a bona, ntho e nngwe le e nngwe e se e fihlile madulong a yona.

¹⁷⁸ Le hopola ntho ya pele e hlahileng pele Sodoma a tjheswa? Morena o ne a bonahatswe ka nama ya motho. Jwale, E ne e le monna. A ja nama mme A nwa lebese la kgomo, a ja bohobe ba koro, mme a ja namame ya kgomo, mme a ema mono a ja. Mme leha ho le jwalo Abrahama, ya qoqileng le Yena, o mmitsitse “Modimo o Matlawohle.” Ka nama ya motho? E. O ne a beha mohlala wa seo A tla se etsa matsatsing a qetelo. Jesu o ne a bue a lebisa morao ho yona.

¹⁷⁹ Mme le shebe molaetsa A o entseng. Ntho ya pele, O buile ka tshepiso ya Hae. Hum! Na le bona lehlakore la yona la thutamodimo? Wa bona, O itse, “Ke o tshepisitse, mme jwale Ke mona ho e thasisetsa.” Mme jwale re tseba jwang hore tshepiso e . . . Elang seo hloko. Ba ne ba letile. Pele mollo o theoha, Abrahama le Sara ba ne ba emetse mora wa tshepiso. Modimo o ipontshitse ka nama ya motho mme a etsa dipontsho ka pela bona, taba eo Jesu a buileng ka yona e tla iphetha ho Kgutleng ha Hae, Yena Mora wa tshepiso. Mme jwale re eleletswe seo nako ya, jwale e tsamaella, dilemong tse leshome le metso e mehlano.

¹⁸⁰ Mme kereke e sa ntse e mpefala. Ha e makatse, re hlile re ka bona hore re Mongwaheng wa Laodisea.

¹⁸¹ Jwale Moya o Halalelang o mona. Ba ka ba teng mona . . . Re a, re ile ra, re se re, re—re ne re ntse re rapella bakudi, empa ke memela aletare. Ke memela aletareng ba kileng ba ipolela le ba eso ipolele. Ke le kopa ho etela le nna tempeleng ya Modimo, e leng ka hare ho lona. Ako kene motlotlwanieng wa maipolelo a pelo ya hao, mme o re, “Morena Modimo, ntlhwekise. Mme o romele Lengeloi, le tshwereng leshala la Mollo, mme—mme o tlose ho se dumele hohle ho nna, hore bosius bona ke elellwe Sefahleho sa Modimo, jwaleka ha Esaia moporofeta a entse mohla Lengeloi le mo amang.” Ke batla hore o etse jwalo, mme o tshephale o tile.

¹⁸² Mme jwale re tshwere tshepiso ya mongwaha wona. Ha re a tshepiswa hlaba ya thutamodimo. Re ne re tshepiswe . . .

¹⁸³ Shebang, e—Baheberu ba fumane dilemo tse dikete tse nne tsa thutamodimo, empa ba filwe pontsho pele ba timetswa. Lotale ba mo tlatsang ba ne ba fuwe pontsho. Ba bone pontsho e le nngwe. Mme jwale haeba Modimo a dumella batho . . . Mohla Jesu a ne a le mona, O ne a etsetse Baheberu pontsho yona eo, O e etseditse Basamaria, mme ha eso etsetswe Baditjhaba.

¹⁸⁴ Jwale ena ke pheletso ya Mongwaha wa Baditjhaba, jwaleka ha ho etsahetse ka mongwaha wa bona. Kereke ya Baditjhaba e a bitswa. Jwale, Modimo a ke ke a fetola lenaneo la Hae, hobane Ke mohlokapheletso, mme O phethahetse, motlalahohle, motsebatsohle, yamatlawohle, mme o hlokapheletso. Haeba A se jwalo, Ha se Modimo. Ka baka leo, le a bona, O ne a tlamehile ho etsa seo A se entseng mohlang oo. Ke ka hona ba tsebileng molokong o mong le o mong moo A Ipontshitseng teng, ka ho tshwana, ho tseba hobane O a tshwana.

¹⁸⁵ Jwale, hola Jesu Kreste a ne a eme mona, bosiusing bona, kalaneng ena; hola A ne a eme mona, ntho feela A neng a ka e etsa, e ne e tla ba yona A e entseng mohla A emeng morao mona, ho fa batho kutlwisiso ya hore E ne e le Mora Modimo.

¹⁸⁶ Jwale O mona. O tshepisitse ho ba mona, mme jwale tsela e le nngwe A ka sebetsang ka yona ke ka tshepiso ya Hae. “Nna Ke sefate sa morara; lona le makala.” Mme makala a beha bopaki ba bophelo bo tswang sefateng sa morara, kapa ha a na bophelo ba letho ka ho wona. Empa haeba a fela a phediswa ke bophelo, a na le bona bophelo ba sefate sa morara. Bo—bo a iqophella, kapa bo sututsa ka matla bo kena lekaleng.

¹⁸⁷ Jwale e bang le tshabo nakwana feela. Mme Modimo wa Lehodimo a ke a nthuse, hore, lona ka theron ena eo ke e rerileng, hore e tle e re . . . Esaia, modumedi eo, enere mohla a fihiang moo a bonang ho hloleha ha motho ya lekang ho emela Modimo, yaba o bona Modimo a theoha, le bonnete ba yona, yaba o a howeletsa, “Ho madimabe nna!” Hobane, Modimo o entse tshepiso e jwalo. O e etseditse moloko o mong le o mong. O re etsetsa yona, molokong wona wa rona. Re bona ntho yohle e dutse madulong a ho Kgutla ha Hae.

¹⁸⁸ Jwale na le a dumela O teng mona? [Phutheho e re, “Amen.”—Mong.] Jwale A ke a nthuse.

¹⁸⁹ Mme ke batla ho tseba bakudi ba bakae ka ntle mono, phahamisang matsoho a lona. Le be le tumelo. Mme jwale ke le kopa ho nka Lengolo lena, Baheberu, ho re, “Ke Moprista e Moholo wa maipolelo a rona, mme O kgona ho angwa ke maikutlo a matshwenyeho a rona.”

¹⁹⁰ Jwale o rapele, “Modimo, e re ke O ame. Mme le Wena, ka nqa e nngwe, o boele o bue ka Moena Branham,

jwaleka ha O entse ka Mora wa Hao. Le Yena ke ngwana ya hlomamisitsweng, jwaleka ka nna. Empa O tshepisitse hore matsatsing ana a qetelo O tla e etsa. Jwale, Morena, a nke ke bone ntho ya makgonthe.” Mme o rapele.

¹⁹¹ Modimo wa Lehodimo, hodima motheo wa hobane pelo ya ka e tshollelwa Chicago le hohle moo ke yang teng, A ke a e pake jwalo.

¹⁹² Monna yane ya sa tswa ema setulong sa hae, ke thaka le ditho, o dutse hantle ka pela ka mona, yena ya phahamisitseng matsoho a hae. Tjhe, yane ya morao, ya apereng hempe e tshweu. Hantle-ntle ha se molemong wa hao, empa o ntse o rapella motho e mong. Ke moreri. O a dumela nka o bolella bothata ba hae? O tshwerwe ke pelo. Haeba e le nnete, tsokotsa letsoho la hao. Dumela sebakeng sa hae jwale.

¹⁹³ Hola feela o ka e dumela! Empa o tlamehile ho e dumela. Ha o sa e dumele, e ke ke ya sebetsa. Monna eo ka ho tshephala.

¹⁹⁴ Mona, mona, mona ho dutse mosadi ya dutseng hantle mona ho ella qetellong, mosadi wa bobedi moleng wa bobedi mona, hantle mona. O jewa ke lefu la colon. Ke tshwaetso ya colon ya hae. Mofumahadi ya dutseng qetellong mono, ya batlang a le hlooho e putswa, ema ka maoto a hao batho ba tle ba o bone. E, ke wena. Ke nnete eo. Ke tshwaetso ya colon, mme o bile o na le dintho tse phoso, mathata. Haeba e le nnete, phahamisa letsoho la hao.

¹⁹⁵ Jwale o amme mang? E seng nna. O amme Yena. Jesu Kreste esale yena maobane, kajeno, le kahosafeleng.

¹⁹⁶ Mona morao ho dutse mofumahadi mona. O na le bothata, hlooho ya hae e a shesha, methapo, bothata. Mof. Pfeiffer, o dumela ka pelo yohle ya hao. Ema ka maoto a hao. Ha ke o tsebe, empa Jesu Kreste o nea takatso ya hao. Ha ke eso mmone bophelong ba ka; ho nna ke molata. E tla kgaotsa. Se tshwenyeh. Tumelo ya hao e o foidositse.

¹⁹⁷ Le a dumela na? [Phutheho e re, “Amen.”—Mong.] Na ha le bone ke sona se A se tshepisitseng?

¹⁹⁸ Monna ya dutseng morao mono. Mono, na ha le bone Lesedi leo? O mobe haholo. O hlalile hlalala mmetsong wa hae. O kile a sehwa; ngaka ha e a mo tshepisa hakaalo mabapi le yona. O a dumela Modimo o tla o phekola? O a e amohela na, Mongh. Stonelake? O dumela ka pelo ya hao yohle na? Ho lokile, ema ka maoto a hao, Jesu Kreste o tla o phekola.

“Ha le ka dumela!”

¹⁹⁹ Mofumahadi enwa ya robetseng ka mona hodima seterechara sena. Ehlide, ha o na settlankana sa thapelo, ntho e jwalo ha e yo jwalo. O shwele ditho. Na o a dumela sena ke Nnete? O a dumela se o se utlwileng bosius bona ke Nnete?

Ha o robala mono, o tla shwa. Empa Jesu Kreste a ka fodisa motho ya holofetseng. O a dumela O tla e etsa? Ha o ka e dumela mme o ka e amohela, o ka tsoha moalong oo mme wa ya hae, ka Lebitso la Jesu Kreste, mme o phekolve.

²⁰⁰ Ke eo o a tla, o tswa ho sona hantle. Motho e mong a ke a mo phahamise hanyenyane jwale, o shwele ditho. Motho e mong...Ke eo o tla ka boyena, oeme o tswa setulong, o phekotswe, ka Lebitso la Jesu Kreste.

²⁰¹ Na le dumela ka pelo ya lona yohle? [Phutheho e a nyakalla—Mong.] Ema ka maoto a lona he mme...

²⁰² Mosadi ya shweleng ditho ke eo a tla a fohla letshwele!...?...

Bua, Morena ka, tlotsa.

Na le dumela ka pelo ya lona yohle? [Phutheho e a nyakalla—Mong.]

²⁰³ Monna e mong ke enwa, ya neng a shwele ditho, o tswile diphateng; tswa dipaheteng, o ntse o rorisa Modimo!

Le a dumela na? [Phutheho e a nyakalla—Mong.]

²⁰⁴ E mong o kae? Diphate tsohle ha di na letho, ntho e nngwe le e nngwe! Motho e mong le e mong o eme ka maoto a hae, o rorisa Modimo!

Ha leshala la Mollo le amile moporofeta!

²⁰⁵ Mosadi ya shweleng ditho ke eo o tla a nyolohela kalaneng! Ho iswe thoriso ho Modimo! Mo roriseng le mo tlotseng!

²⁰⁶ Monna e mong ke enwa o tla kalaneng. Mo shebeng ke eo o nyoloha ditepisi, Moena Fitch.

²⁰⁷ A re rorise Modimo. Phahamisang matsoho a lona mme le ise kganya ho Modimo. [Phutheho e tswelapele ho rapela Modimo—Mong.]



TSHWAETSO SST63-0803e
(Influence)

Molaetsa wona, ka Moena William Marrion Branham, o rerilwe sethatong ka Senyesemane Moqebelo mantsiboya, Phato 3, 1963, mane Sekolong se Phahameng sa Lane Tech, Chicago, Illinois, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2013 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org